

მარგვეთისა და უბისის ეპისკოპოსის, ყოვლადუსამღვდელოეს მელქისედეკის საშობაო ეპისტოლე



„იშვა, ვითარცა არს შობად ბუნებისად ურცხვნელად, უჭრნელად, უვნებლად“ (წმ. ეპიფანე კვიპრელი).

ქრისტესმიერ საყვარელო ძმანო და დანო!

ქრისტე იშვა!

ყოვლადმონყალე უფალმა ინება, რომ ამ წმინდა კათედრიდან კიდევ ერთხელ მომელოცა თქვენთვის შობის დიდებული დღესასწაული, ერთად გვედიდებინა ყოვლისშემძლე ღმერთი, ხოლო წუთისოფლის მკვიდრთათვის კი მშვიდობა და სათნოება გვესურვებინა.

გაიარა კიდევ ერთმა, განსაცდელებითა და გამოწვევებით სავსე წელიწადმა, იწყება ახალი წელი, რომელიც ჯერ კიდევ არ ვიცით თუ რას მოგვითანს და რის წინაშე დაგვაყენებს. იცვლებოდა, იცვლება და კიდევ შეიცვლება ჩვენი სამყარო, არ იცვლება ერთადერთი რამ – ყოვლადძლიერი და ყოვლისშემძლე ღვთის უპირობო სიყვარული ცოდვით დასწეულებული და დაწყლულებული კაცობრიობისადმი, რომელი სიყვარულითაც მისი მხოლოდშობილი ძე მდაბლად მოევლინა სამყაროს და ჩვენივე

ხორცი შეისხა! ამ დიდებულ და გონებითმიუწვდომელ დღესასაულს ვზეიმობთ დღეს და ერთმანეთს ვახარებთ – ქრისტე იშვა!

ჩვენ, ჩვენი უძლური ადამიანური ბუნებით ვცდილობთ გავიგოთ შობის არსი, ჩავწვდეთ მის საიდუმლოსა თუ სიდიადეს, მაგრამ ვერ ვახერხებთ ამას და ვიბნევით. ასეთ დროს, აუცილებლად უნდა გავიხსენოთ ეკლესიის გამოჩენილი მამა და ღვთისმეტყველი, წმინდა ათანასე ალექსანდრიელი, რომელიც შეგვაგონებს – „დღეს ბეთლემი ზეცისა მობაძავ იქმნა: ვარსკულავთა წილ ანგელოზნი მაქებელად ჰქონან, მზისა წილ მზე იგი სიმართლისად მიუწვდომელად დაიტია. და ნუ ეძიებთ, ვითარ დაიტია, რამეთუ სადა ღმერთსა ჰნებავს, იძლევის ყოველივე ბუნებისა წესი, რამეთუ ინება და იქმნა, გარდამოჴდა და იჴსნა და თანა-მორბედ ყო ყოველივე ღმრთისა.“ დიახ, ინება და ასე მოხდა, რადგან უპირობოდ ვუყვარვართ და ესაა პასუხი ყოველივეზე. არ არსებობს ამაზე აღმატებული და ამაღლებული ახსნა. ეს სიყვარული უნდა იყოს ჩვენთვის მაგალითი და მას უნდა ვემსგავსოთ ჩვენი მოყვასისა და, ზოგადად, მთელი შესაქმნეს სიყვარულში.

ქრისტესმიერ საყვარელო ძმანო და დანო, იმ დროს, როდესაც ბეთლემს შობილი ყრმის მადლით გაცისკროვნებულნი ერთმანეთს ვულოცავთ და ვახარებთ მაცხოვრის შობას, არ უნდა დაგვაზიწედეს, რომ ჩვენ გვყავს ემიგრაციაში მყოფი, თავშესაფრებში მცხოვრები, საოკუპაციო ხაზს მიღმა დარჩენილი და, უბრალოდ, უკიდურესად გაჭირვებული თანამოძმეები. ვილოცოთ მათთვის, ვიფიქროთ მათზე და გამოვიყენოთ ყველა საშუალება, რათა ცხოვრებისეული ტკივილი შევუმსუბუქოთ. დაე ქრისტეშობის სიხარულით აღვივსოთ ყველა და ეს სიხარული სხვებსაც გადავცეთ! არ დაგვაზიწედეს, რომ მაცხოვარი ჩვენთვის იშვა!

თქვენთვის მლოცველი

მარგვეთისა და უბისის ეპისკოპოსი მელქისედეკი (ხაჩიძე).

ქრისტეშობა 2024

[მარგვეთისა და უბისის ეპარქია / Diocese of Margveti and Ubisa](#)